

風
希
堂
詩
集

序

風希堂詩四集集各分體浦陽戴東珊先生著繼輅以嘉慶辛酉入都門先生尚侍學

上書房願未得一見後先生從子春塘先生備兵廬鳳繼輅以大計及官滿再爲薦舉弟子始得盡讀先生之詩時先生已引疾居家銜二十年矣先生少年九工五言古體淳悶似陸平原饒刻似謝康樂長篇妥貼排冪出入杜韓大率皆精心鍛鍊之作通籍以來格律稍自積放於東坡石湖諸家無意撫倣而往往得其天趣蓋先生四十後深求泊心復性之學旣與道大適視辭章

如糟粕漸不措意而積理已深吟風弄月之懷偶有所觸意到筆隨無所用其迎距而凡解悉屏此其深造自得之境未嘗不寄之於詩而非詩之所能盡春塘師將以道光丙戌梓先生之詩行世先命繼輅以校讎之役遂識數語質之吾師亦願與世之讀先生詩者各自勉於詩之外也陽湖後學陸繼輅序

題辭

積薪心莫喜累碁心莫悲古人往矣不可追古人之風
猶可希東山居士力師古精靈夢寐相因依東華蹀躞
幾寒暑高歌欲使梁塵飛君言學古首經訓如溯鼻祖
沿孫枝登高一望眼如月澄壑奧寶伴燃犀典謨雅頌
童所習重規縵構森昭垂士不通經豈足用堅塗丹蘄
無其基失所憑依信不可武無豐鎬湯無鄣點竄塗改
或未暇要歷堂奧披籒籀故其爲詩閎以肆琅宥凌轢
爭酣嬉隱隱絃絃大聲發輻輳不絕如奔馳天琛水怪
互涌現璇瑰瑤碧生光輝迴飈駭碣忽驚絕矯若駿馬

辭金羈元龍湖海氣莽莽不自修飾亦如之得意疾書
風雨快龍文百斛何淋漓有時刻劃及楮棘斬新花藥
天孫機要有元氣相綰轉雲霞充咽如錦帷讀君之詩
證君語希風作者非君誰夜闌莊誦肌起粟秋雲入戶
風吹衣心精一綫自今古汗漫八極可以窮攀躋月門
馬以智題

跋

風希堂詩稿往復而不可窮遷變而不滯舉大而力不
詘入微而旨不晦零雜兼併而不亂繁稱博引典覈而
灑如不紛卽奉爲韓杜大家可以無愧私心所最喜者
山居歸田二集如射者之貫的其精神與之俱至卽不
必皆有爲而作而游泳性情大道寄焉至東華翰苑二
集其大篇春容無殊斯旨而尋常應酬之作率易放浪
之詞或不免焉作者方希蹤於閩洛必不肯齊步於才
人凡遇此等悉擬從刪庶無戾著作之盛心云爾臨川
後學李培謙識

風希堂詩集目錄卷第一

山居稿

五言古詩

采菊篇

舊遊雜興

仙華山

劉龍坪

冰壺洞

智者寺

會稽山

臥龍山

嚴陵釣臺

海昌觀海

望裏湖諸山

鴛湖書院謁陸清獻公祠堂追和凌緘亭教授一

百韻

春齋對雪分韻得玉字

又雪疊前韻

霽雪三疊前韻

舟渡蘭溪

七里瀨

合江亭

泛嚴江舟中瞻眺

洋漲洲

漢末孫氏種瓜處

山居秋感二首

四禽咏讀爾雅作

九靈山

述懷四十韻

擬古四首

約諸公九日遊湖頭山

己酉春日將北上次韻和朱西崖先生送其子寧

遠茂才來館敝齋見示之作卽以誌別

卷第二

山居稿

七言古詩

楊丈統甫歸越歌洩溪行以送之

乙未仲春傳經書屋小飲分韻

春分後大雪

登少女峯

荆卿失劍歌

紅橋版書尺歌爲張芑堂明經

燕昌作

次韻題湘管聯吟卷并送陳無軒焯之官慈谿

題墨馬圖

將去西湖畱別院中月季花并呈諸友

雨後偕葉履仁陳獻九湖濱晚眺

禾城訪曹種梅明經

出郭尋荷花至張字圩回舟過鉏月居士閒話

有作

曲池篇

西園賞菊長句二首

有感

三江間謁湯太守祠

江縣吟

秋蘭

秋海棠

磨心潭義烈行

并序

合溪黃氏宗祠扁文學二字方正學先生爲田間

居士黃

景昌

書睇觀成詠

戲題蔣六兼畫虎

割肱行爲張孝女賦

武林寓舍與郭春林

航

話舊

五言律詩

遊仙華山二首

華川道中

新晴

西興晚眺

越州

東趙德淵

七言律詩

對雪得友人書分韻

過五洩

宿五雲山麓

西湖雅集送鄢畫邨歸湖南

湖濬步月卽事

嘉禾攬古四首

婺城寓齋遣興

高閣晚眺

呈王東塘翁二首

杜節愍

學伸祠

五言絕句

南湖曲二首

七言絕句

蘆鳥船吟四首

山居漫興

卷第三

東華稿

五言古詩

題閔正齋醉客圖

咏餽餽同倪二韭山屠大潤芝作

題閒雲出岫圖爲張心柳明府作

壬寅九日約同人出遊

和倪韭山咏石炭四十韻

答張二秋暉次韻

乙巳三月送高二樹庭旋里用倪二韭山韻

讀蘇詩戲作卽用和子由論書韻呈九山

張二蔗圃欲得余所懸韭山畫紅梅立幅余戲舉
東坡仇池石例謂若能以韓幹二散馬易之者蓋
可許也越日蔗圃以用東坡韻詩來依韻戲答
玩月同韭山作

遣興二首

七言古詩

題馬楚銅柱記

海曲煙村圖歌爲倪明經小山賦

并序

秋齋玩菊約諸同年同賦

題心齋印稿爲宣城張上舍季和作

庭草爲僕人所除韭山有詩次和

辛丑閏五月送倪二韭山游汴梁

後以溽雨未至而復

看劒圖歌爲張大丹華作

題韭山畫曉山瀑布圖

題韭山畫山水卷用東坡煙江疊嶂圖韻

月夜卽事用東坡定惠院寓居月夜偶出韻

卷第四

東華稿

七言古詩

醉歌行送葉大栗垞還婺州

風希堂圖歌

有序

風希堂圖後歌

有序

屠大潤芝題其學舍曰小於舟卽用東坡詩韻賦之

買菊吟

送鄭雪濤經歷

鋤

之官貴筑

五言律詩

渡黃河

過趙北口

宿雄縣南郭

倪九山

象占

爲余畫石宛似五洩山中卓筆一峯

小詩致謝

夏日雨後小集

霽後小集疊前韻

五言排律

和韭山雪水茶二十韻

七言律詩

襖糊寓室新成有作呈韭山

對雨作

遊仙詩四首

癸卯元旦作

乙巳二月作花朝二詠呈諸公

祝花

花答

五言絕句

題孫後齋教諭寄象圖二首

敦艮堂

三壬書屋

七言絕句

後栽花咏二首

春晚卽事

別秋四首

春愁

楊花

卷第五

翰苑稿

五言古詩

貞女篇爲鍾吾高氏聘婦蔡作

題梧門圖爲伍堯祭酒法式善作

題雪泉圖四首

聞從弟

愷

從姪

賢

十姪

攜

幼子

慈

同補博士弟子

率賦

初度感懷

東川行

送應次峯大令

丹詔

之任義烏

趙恭毅公世德詩爲公元孫舍人

懷玉作

縣令

東武吟

答陳卓巖茂才

維峻

見贈並送之湖北

寄同邑朱西崖先生三首

出郭卽事

七言古詩

題秋江垂釣圖

汪忻州

本直

重修元遺山先生墓田詩

題觀潮圖

貞女篇爲海寧徐氏聘婦祝作

丙辰小除日洪穉存前輩招飲賦呈

梁溪詩家

有序

巫山高

法時帆祭酒示西涯詩屬和

五言律詩

盛暑憶山中八首

直春及軒和陳少司馬梅垞韻

七言律詩

飲抱膝草堂呈諸葛仲山

天西

天都

中秋對月二首

集積水潭席上分韻得年字

七言絕句

鄉山雜詠八首

邵八季民遊杭蘇歸詩以奉詢並書箴頭三首

雜詩

去國門口占

卷第六

歸田集

五言古詩

茯苓仙

天台山

婺士

和柳文肅公朔還詩十首

并序

髮脫

題蝸室銘

并序

九月二十三日同孫球雲至後坂賞紅葉過兩都
橋循油車園看老松蚘繆如龍栗樹坪坂紅樹尤
盛歸過春塘碓山齋看菊花還至前溪賞玩徑歸

題石影山房照

并序

題徐季卿

偉

福庭文園冊

并序

七言古詩

讀陸放翁岳池農家詩依韻效作

授衣鉢詩爲蓮舟上人作

萬歲藤雙杖歌

五言絕句

羣卉詩

蒼筤

紫藤

紅荷

春蘭

芭蕉

風希堂集卷第一

山居稿

浦陽

戴殿泗

東珊

五言古詩

采菊篇

清晨步東籬羣花向人笑無將塵土容試攬清芬妙清
芬非一枝請言未開時移根自幽谷甘泉迸清池深培
東華土淡和煙霜姿朝行褰薜莽夕行斬蒿翳羅列千
百種芄芃茂葉滋芴人顧而哂是子愚且蚩不聞春豔
冶顧向秋淒其凝情雖擁護中輟理則宜佳蕤秉天精
深膏毓地秀一香可千年煌煌早云靚逸客來歡欣採

擷久歆嗅光華森滿堂高舉視宇宙此時顧哂者亦復
聲喁喁土腴吾不惜餉遺當相同誰令花滿眼而不爲
我容答言傲霜幹厚薄非所云君園多馬莧珍惜逾荃
蓀若令待扶植蕪沒秋葵根況今金風豔未阻開清尊
光華不相掩粲粲存爾眞陶公去千載爛漫明秋原四
座且莫喧黃菊本無言

舊遊雜興

仙華山

靈峰矗千仞色擁蘿藤壯鐵絙互鬱盤金仙時演漾夙
抱長生懷欲攬無盡相天風入寤歌碧霞森背向高巔

拂晴明行出飛鳥上時當六月初冷氣撲昭曠神靈恍
對語真氣淪腑臟夷險何足陳衝雲迭相訪

劉龍坪

黃帝不學仙陶唐聞豢龍飛天涉廣海窈隋此潛蹤雲
來東西潭電下八九峯人楓崖影黑石與霄漢衝鳥跡
不到處陟險心腑沖蒼黎資沛艾壇宇忍翳蒙仙子拾
靈藥瑤草時豐茸猶傳龍母墳飛瀑挂長虹

冰壺洞

長山亘百里元竅隱巖腹枵然大壺尊鍵封自深隩有
水炯白虹灌頂還出腹潺潺一萬丈幽邃遞擊觸雙龍

蟠其根澄寒澣襟掬客來三月中村飯飽菰蒿紅紫被
荒崖眞仙理未矚洞天包衆有巖罅藏平陸騰蹕誰能
休攀花飼白鹿

智者寺

策杖杪欒林招遊石泉頂雲巖闕清光月洞散空影庭
邊竹差差山際田町町自來西方教東土轉鋒穎性習
鍾益奇精魄鍊逾警蘊眞有大德人去聲猶炳入門心
膽徹擊鉢氛埃屏岡嶺互屈盤扶搖鬱道挺禪縛姑勿
論遊神超溟滓

會稽山

靈山導東白飛龍集會稽蜿蜒衆江水曹浦雙虹霓萬
神拱玉帛九寢聯臯夔越甸一隅地無余百世支凌厲
度三浙縹緲思元圭馳邱壘素芷凌椒攬宿蕙大海東
南迴蓬山浩渺低秦皇企遐績篆刻矜羣黎金書祕玉
冊遂古誰能窺

臥龍山

龍山氣何佳蒼鬱羣水閒萬瓦粲甲宅嚴城森堵環州
宮承霸王郡牧炫神仙鏡湖春風來鱗浪搖山巔迴青
并縐綠飛罩街衢煙琳宮聳百尺緩步窮攀援游目想
種蠡掉頭評計然奏功已往古峻嶠亦千年何當慷慨

人于此誅茅營

嚴陵釣臺

孤舟送綠帆雙臺峙雲表萬古長江春綸影風如掃瞻
星氣在天枕石情依草借問雲龍遊何如薪樵老相逢
澤上翁形容實枯槁飲犢似巢由拾芝疑綺皓徘徊想
碩人餘風尚傾倒當時隱淪窟今日宦遊道百丈擁前
灘鳴鑼祠月曉

海昌觀海

高風蕩寰宇上邑雲海邊龍祠積壯麗佛塔森雕鐫初
聽夜來潮捲屋動桷椽詰朝觀遠溘冥冥日孤鶩長艘

排山岳金隄擁繩縱早知煙影外磊砢仙人塵近海維
腥霧蓬宮誰潔蠲青山走甌閩出沒如夔蛇縱覽輒萬
里何當巢其間

以上八篇兼有鮑謝

陸繼輅識

望裏湖諸山

客居澄湖灣直爲探幽便山容共水光不擇爭自獻裏
湖何悠悠隄截萬婉變湖水所發源儲姿極英蒨雲稠
深淺灣陂夾短長甸一碧自通融半湖無葦繕我自住
山人看山每增戀妍秀旣神怡宵深難目倦晴曦復霽
蟾雨雹兼雪練將聯四時容一盡羣源變

鴛湖書院謁陸清獻公祠堂追和凌臧亭教授一

百韻

讀書嘉禾城撻戶久不出自夏倏徂秋迅駛七十日門
庭衍清光園舍資靜逸神明斂放紛心迹驗判一巍巍
陸夫子聖緒紹不威導疏洙泗源重整儒墨裂每厘好
辨功衆口息曉刺本根訊何在深機與剖抉乞孰播開
羞害已龍斷烈蔓草猶思除醜怪邈不黜神人扶世道
赤手無奇術先遣利欲空餘事及曇佛聖基在欲惡世
事坊頽溢參求入性分百備靡一缺敬立自順正知深
無蕩滌從之動靜咸不逐用舍奪平生事爲誨厭倦泯

可必亦越宰疲氓勤劬父母厥朝陽曦鳴鳳梧竹響不
絕大用斯可期遄歸探月窟當途劇薦揚儕輩敢倚埒
夫子懷兢兢立議劉雄闊六經億義疏洛閩萬辭說渾
會無多條觀生在一實舉舉修學子常業受弗失便便
博辨流玩物賴卒拔光芒照中天持守幾篇帙心純衆
理偕粹精無倫匹斐明秋毫視責勇僨車過就中雜纖
芒神力罄洗伐上窮二五端人道所生活旁摘緇黃流
餘風未沫歇小學習邕孺端然養芽枿日程肆攬古不
共雕華沒奮跡逮周宋揚馨始吳越道脈遠且宏繁詞
詎終述天高氣澄明閒坐戒趨蹶凌晨挹朝采薄暮返

初質講貫縱未勤階庭疑可掇嚴祠映碧水拜禮敢輕
僣芹宮育賢地有享威儀率精廬附左宇清蔭槐桐拂
滋培有蘭蘅灑掃去蚍蜉容我日觀光朋儔盡秀發風
月匪娛嬉身聲瞻度律緬想百年初時序何閃歛百家
方雜奏韻調頗龐鬱良玉厠砥礪精金攪鉛鐵迷途示
者誰闢異理反紂此道本深沈涵養非儻忽云何設門
戶口口自齟齬杏壇列游夏希聖起纖悉不聞德言科
交戰元黃血藉云守孤宗轉近西方鉢尊聞更行知窮
本自達末金溪與姚江特立豈相軋立教重矯枉因時
救煩熱所以別白嚴頓似揮鎔闕自來羣聖統不在三

寸舌觀者須善會千古非遐契冥思究端倪謝見未堪
屑低徊步脩廊輾轉印賢達安得起昔人鳶魚問活潑
高山仰未窮遺文恣探穴巍堂近樽俎幸矣鞭笞矻昨
來翻故紙喜見歌誦設矯矯凌蒼溪千言頌彝物高懷
陳素王詞旨何崑崙侃侃述思孟勁爽語不咽謂言得
公微繩古古莫脫真傳溯徽國上繼祥麟筆架漏惜王
韓游揚殊軌轍塵根盪清風燎勢沃溟渤流韻迴未已
盼蟹每來括提耳章縫徒聳立念精潔瑰詞闡道要氣
與杜韓列獨其詆前輩將用勤敷錫後生苟習傳安用
薦椒飴抑彼藉伸此在理本非吉日星爛昭垂泰華儼

疏乞何俟斥衆彙始見高明畢白鹿非罽訟鐫碑示羣

褐

原詩云如何白鹿講器訟仍未歇

無將末路荒盡委姚江茆

原詩沿波泊王

何視履

愈輕佻薛錄與陳辨精純照雄兀先生所服膺概用掃

維紆

原詩薛錄嘆尚疎陳辨嫌未悉

儒釋界瞭然雜糅有申屈體明用

自宏敬義在密勿匡居逞談鋒千秋一豪髮不如體無

言大樂奏淳闕煌煌古儒宮聖教置郵疾配侑東西廡

鴻溶樹碑榻堂中肅籩豆牆外凜侯鱗

盛朝酌大典餘子敢髣髴斯文理在天下士莫呶噉昧

學幼迷津中年思忉悒曾研定性書亦訝觀心特周章

忽前後倚放念明哲思裁狂簡奮有志貴先竭斂容此

棲遲稽古方遒率他年叩眞師吟詩證爾室

不但次韻之工如腰之忘帶通體理語不腐字字精
造置之韓集中殆不可辨

陸繼輅識

春齋對雪分韻得玉字

天心惜豔陽神意迴顓頊暫鬪百花明旋摧羣野綠雕
鏤帝宇寬騰蹕坤輿促秉質有蕭疎乘空無撥觸輝光
雲月逃嚴緊冰霜束宙合阻遙征帷窗生邇矚春思隔
日暄冷憶連宵酷樸遛响含林森蕤形動幙堪歌昔昔
鹽如積家家玉豐稔壘新氈輕翰飄白鵲兒童起嘯呼
蟬蚊翻踰跼試舉幽蘭詞詩腸滌非緇

又雪疊前韻

精光邁穹宇妙象超軒頊雲意拾餘酣雪花飄賸綠空
衢霽復陰曠野團彌促皓岫挾氛氲晶簾添抵觸奔搏
有合圍散漫無羈束天際失新標巖邊遵舊矚全來甲
陣寒急去劒鉞酷淅瀝閃濤瀧吳陵兀冠幘銀龍百萬
鱗粉女三千玉頭角撼青猊羽毛驂白鵠沁人肝腎深
擲地溪山跼花鳥慎勿愁來朝恣妍縛

霽雪三疊前韻

司神契皞芒御氣辭冥頊桃杏粲妍華莢芽撐嫩綠連
朝豔雪蜚下午輕陰促滌蕩霄宇澄矜恢羲燄觸雲鱗

谷底潛霞帶天邊東炯晃龍堂遊森寒蟾府矚泥塗擷
翠徐潔白消氛酷山館整琴尊溪船攜枕幙神娥姣弄
珠帝帑勻堆玉高試摩空鷲豪飛橫海鵠能效霽不湮
頗信詩非跼汗漫鶯花閒快洗瓊蕤縹

舟度蘭溪

煙際別雙橋雲中下孤槳江洲渺薄迴山縣豁清敞夙
多懷古思屢入超羣想問道遠無從懷人悵奚往江風
西南來澌浪分下上輕篙正灑落殘日明菰蔣邂逅舍
之去舊蹟缺心賞香溪迴清瀾仁峯聳高掌明當事沿
陟微情愜疇曩

七里瀨

嚴陵輕萬乘茲山昔避世雙臺臨水濱萬艘若鱗次白石何皓皓藤蘿鬱迢遞直令千載人不忍重釣駟高風抗吳札逸韻動南裔緬想深造者卓越辨義利倡道得先聲儲精識幽寄江山如有情草木本無異不有高世蹤羣峯蹇蒼翠

合江亭

孤亭聳江臯餘勢極飛舞雙江天際來雲波會前浦有如兩白龍蜿蜒狎簷廡微源渺澄清衢葵渾且鉅波漱萬山石浪挾羣州土鍾儲斯不異靈蹟照千古水合無

盡流亭空自軒舉嚴城去幾里壯勢入吞吐輟棹此沿
洞清風溢靡杜

泛嚴江舟中瞻眺

舍輿謝疲阻登舟事恬逸幸茲山水雄素心慰適鬱澄
瀾涵鏡面白波下嶮崿風高帆片片灘峻纜聿聿嚴臺
旣西聳孫陵復東揭崇山足光怪清江寄傲兀流覽豈
徒爾椒觴渺難述疎篷隨輕鷗弔古氣蕭瑟明當還空
山友麋踐深樾

洋漲洲

漢末孫氏種瓜處

亭亭一洲渚其中繞田間樹木何翳鬱雲水相縈紆前

臨胥江波上挹桐君廬花橋左迴曳湖溪右舒徐寥廓
睇僻壤下里供耕畬傳聞昔孫氏發跡乃茲區白鶴沖
紫霄黃龍呈赤符江東跨宏廣霸業開雄圖雲出雨萬
山膚寸爲厥初長蛟舞天漢絲弦繞菰蒲有似此洲渚
崢嶸發洪模舊社閱千載江山幾榛蕪來游倚茅店喚
渡嘗新沽

山居秋感二首

金飈颯然起逸勢連羣峯晶光百千里搖漾碧檻中登
高望所憶蒼莽愁無窮幾輪倏已西江河日流東馳光
赴游目突兀霏晴空田舍二三子喜慰禾黍豐酌酒相

勸迪溪山態空濛攬石持作枕截桂以爲筇嘯呼自浩
然何必參羣公

殘葉蕭灑光寒花蒼翠色宵蟲不平鳴晨鳥交爭食賴
有松與桂鸞皇時戢翼深根天所培茂彩人斯植露雨
連雪霜蓬蒿壓榛棘於時具眞品秋寒盡堪識梁棟鬱
穹隆深山非偈仄西風入簾幃覽古興遙憶雲鴈肅羽
儀誰致扶搖力

四禽咏讀爾雅作

中州有鳳鳥夙昔鸞爲親龍文復龜背九苞叶慈仁唯
鸞翼羣子寄宿嘉樹春中道喪儔匹骨肉多背嗔羣言

奚足擇鳳德以爲因何來啄木侶椎剝無逡巡掠取女
牀樹鋪作梧桐珍翩翩羽蟲長光華煥若神

桑扈稱交交好啄下田粟飛翔何鷺領竊脂顏色渥曲
觜復淺毛深心更婪目汝本九扈長農祥慎祈祝如何
拾人遺遍野起怨讟好風翻然來耕畬自奔促秋成閱
場圃遺粒如珍玉充腸年復年少啄亦已足

輦翟瞻五采地德產四方東西及南朔異稟各成章虞
廷重繪服雲羅遂高張氤氲彼文翟來自羽山陽非無
四國美土貢煥獨良不知何方鷗憤起爭輝芒願持片
羽翮特出掩羣光咏彼雄雉詩伎求寧足臧

鸚鵡非凡鳥能言實珍禽心希表羽族羣類繁以森微
名忽從削秦隴空深沈能言易食言肥澤不足任翠衿
託紅觜人口非人心元公重實行曉曉桑土音猩猩非
靈獸小唬標空林中宵繹爾雅以作多言箴

爾雅釋鳥
不載鸚鵡

釋獸載猩猩小而好唬不曰
能言讀此有感因漫及之

九靈山

鬱鬱九靈山重巒出煙表參差鸞鳳翔勢與蓮峯杳有
時絕頂嘯天漢凌忽杪祥光四時播閃爍不敢瞭邈自
翕闢初靈氣何年肇遠祖能軒公骨力開元造茲焉稟
神秀一室追旁紹精誠遞酬餉陟覽羣峯小德業與之

齊茲山遂不祧到今巖岫閒剛風拂蘿蔦卻看雲雨會
蒼翠極瀾渺拂石啟雲英開林斲芝草相從抗遠懷鴻
洞長天曉

述懷四十韻

力絀謝耘耔不穡愧隴畝揮斤巧者誰顏汗觸傷手人
生智慧分藝習視所受塞職非偶然窮年竟何有窈窕
山庭深空濛古苔厚幽帷褰蘿蔓翠竹理戶牖迴寄非
一端高情矚前後經綸振古新要道垂蒼后薄德自三
季情欲紛相糾頽風未可知積習殊已狃被褐啟幽逕
清修厲重阜沈深破垠塢豁達望星斗有抱必瓊瑛於

中懷刻鏤矜奇庶姱節亦足厭怩忸坐此自兀兀斯意
終難剖風吹幽獨心虛壑長藜莠山禽習叫嘯野鼠散
奔走鬱鬱灌木林百尋眞獨壽粲粲凌蒼花纖屑亦有
取挾冊哦其閒研悅不去口神奇世士驚糟粕古人朽
將懸呂覽金甘覆太元瓠東序蕤賓鍾天壇明水酒噲
呖發淡泊渾會思清眇日力擲豈虛嚴程戒斯趣玉珮
芙蓉纓霞冠杜蘅紐杯水思扶搖君車亦糧糗側聞至
人教敦朴風化首德意被士農歌聲洽矇眴拔擢或幽
冥文采爭刮垢森森廊廟具磊落參彝卣未信蓬蒿賤
深藏無與叩詫豕歸遼東驚駝出隴右衣襟非百結卻

立念跟肘通方性所歎密勿情所負努力望東臯樵採
供薪爇緬想先典刑高風振林藪還思百年外寥落將
安偶志業夫豈徒衷懷聊且苟在已不外求思成期在
久

擬古四首

幽情不可羈汎濫追雲翔上攀瑤臺祀延頸眺八荒建
木植無影左右飄神光歛吸不暇瞬懷冽披瓊漿挹精
而取華攬置彼中堂相逢同心子神力鎮扶將握中斯
有物指顧增徬徨

形止神與馳靈蹤渺無息元空播雲雨儀軌胡由測枯

槁山林姿專志自藏匿詰朝儀鳳翔文采被五色世界
本瀾翻大道原繩直昭攝逕寸心洞照常默默抗懷彼
姝子神理無能卽

置酒臨高臺曠望嵯峨山親朋從我遊被服麗且嫺相
將邀帝里雙闕造雲閒斟酌北斗柄四氣爲循環感興
軼往古幽渺無由攀神墟奠九野遺蹤偉爛斑拊節一
長嘯崑邱入戶闔無爲守塵躅席用凌雲關

長林何煒煒高嶂亦嵯嵯陰陽所經亘煙雨相盪摩不
見桃李樹風暖春揚花軒車蒙錦障雜沓綴綺羅巖幽
抱節士當此亦來歌白日無私照高穹麗且和三春復

九秋傾注如陂陀達人審至理俗士豔光華華實道安
在沈吟心澹沲於焉雲咸奏奇響軼山阿

約諸公九日遊湖頭山

逍遙意如何良月已逮九疎風拂襟袖日出斷崖口穹
窿百里閒選勝孰爲首湖頭白鶴菴峯頂黃花酒攀蘿
起四顧煙雲盡余友俯卻千微塵卓立參元黜閒隨二
三公佳晨副長久萸囊且共攜薜荔此多有追歡吾事
畢來歲知誰剖

己酉春日將北上次韻和朱西崖先生送其子寧
遠茂才來館敝齋見示之作卽以誌別

大哉宇宙初神機鬱盤礴散爲下界氓靈景寄郭郭上
窮萬萬古風氣何渾噩深探六經言難得聖神諾下視
歷代餘八字孰著腳孔光及馬融真不值一噓讀書有
先資衢尊非漫酌抽心滌其源厥功等疏淪隨事日觀
理醒醐味香酪崇巖柏葉餐靜嶼梅花嚼貞質暨清醅
盈盈觸齷齪安得壁立人一起千載弱昧昧懷先民建
安赫如昨精思析百脈會合歸一橐莫歎鴻濛杳魯鄒
有根萼勿徇藻繪鮮班揚終落魄陋生懷此久九軌道
不錯惜無凝重力潛精固肩鏹中年涉塵務高風溯京
洛目睹九州大心企百王作洪河浩瀾翻泰岱如有約

更研圖籍府手胼足爲躓昔制燦經緯新猷蔚網絡品
類歧厥遇剛柔中善惡以此疲精神亦足解束縛端信
裨瀛環眞言非浪謔悲風掩白雲血淚盈緹幕曾不逮
烏私煢煢骨空鏤土銚兀殘鐙頽衷靡究度羲和迭遷
逝哀抱何由擴顧惟衆雛愚黎棗日探索思欲授章句
橫經破幽冥城西古君子風力翥鵠鶚南喬北有梓辨
古森彝勺惠我響然臻蓬門足棲託摯論錫古風叢嵐
別峭嶠相將極雕鏤育德自基拓闔闔春飈生零露點
薇藿言方事遠遊曠陌閱煙箬悠悠心之愁別緒縈靡
樂長山屹千仞奧學今中落迴盼仙華巖何處燃藜閣

鐘鼎與山林隨分竭誠恪衆賢遺業在靈臺敢廢格磨
詩匪贅言曲距三百躍

風希堂詩集卷一終

男慈校梓

風希堂集卷第二

山居稿

浦陽 戴殿泗 東珊

七言古詩

楊丈統甫歸越歌洩溪行以送之

別意憑誰寫寥閨幽澗落泉風蕩壁塵世嗷嘈不足論
君家老人吹鐵笛君家近住南屏陽屏前洩水流鏡光
金沙蕩涵萬峯映中有雲氣時飛揚脫衣酣步綠雲頂
伐木聲涵今古永鐵崖坪聳心悠哉龍子潭空色俱靜
霜蹊雪逕時徘徊橫睨碧落凌飛埃謂言蓬廬邇神境
策杖兩載翩然來南山之桐北山梓誰識其中錯榛杞

風希堂詩集卷二

世事相看東嶺雲人心只合西溪水高樓逸辯何翩躚
時傾古墨驚四筵驅經役史不芥蒂恍如碧海皓月蒼
山煙引人清興殊未極渺我逡巡轉愁絕促席方傳醉
後歌言歸卻度雲閒洩洩溪流水清泠泠七二奇峯拔
地扁定知靈鑄長終古夜夜吟龍與細聽

乙未仲春傳經書屋小飲分韻

羣山之中一峯雄萬花春到光如虹傳經堂前酌春色
矯首突兀看青穹漢家太傅大小禮一經百世垂無窮
來居此廬李唐始厥後文學多春融今朝在席有馬趙
張侯孝友真古風邠卿注孟南郡悵追數舊學皆可宗

六經連箱應誦習惜少杯酒滌淺衷閉門佔畢豈足貴
磊落大意期身通饑斯飮粥渴斯飲繚以棟宇庇厥躬
淵源宏大歲月積豈得謔浪等憤蒙春風吹筵杯影淥
新枝猗猗階下桐崇蘭根深紫篁茂碧流吐納溪當中
酒闌拈韻有新作席上款語開心蓬呼童繕寫誌歲月
乙未春仲山堂東

春分後大雪

杏花落園一尺深柳梢壓戶千黃金天公勒春試新凍
百鳥躑躅無敢吟巖浮雲歛川吐陰狂風迅掃不滯淫
謂言夜湧海日赤際曉闢門雪萬尋茫茫神物眞奇縱

人
不
知
三
十
一
言
七
脇野迴山萬緣動天驚箭急羽繽紛不遣揚雄吞白鳳
今年春分日較遲坐見夾鐘送月仲舊年臘後雪不霏
妙撒瓊蕤此酣弄重崖錦繡冰作光天邊宮闕堆琳琅
神人絳節碧桃漿農戶耕牛壓背霜誰家行客滯遠方
重披衿衣塊壘裝獨惜連旬幽臥客美人不接梅花香
橫空飄灑意未已綠竹橫眠半生死簷頭殘滴走纖花
閣上連陰鋪墨紙爲問春堂姑射仙繁歌應待清氛洗
偶來拈筆趁餘春險韻分曹樂何似

登少女峯

軒轅一去少女留玉爐丹杵風颼颼
嗣經唐帝畫井界

始知此峯落揚州五千載後新來遊吹笙擊玉峯上頭
赤手攀天天不遠鐵鎖攢空石棱轉飛鳥高凌雙髻丫
雪乳雲英滴俱滿坐令白日如涼冬高風吹雲陡不窮
下方雞犬渺無跡卉服蘿裳參帝鴻

荊卿失劍歌

全燕地圖眞可惜壯士挾圖輕一擲七首亡秦光計細
不獨荊卿拙劍術臣以頸血濺大王趙人賴有廉兵強
矐目漸離無後顧秦宮白日爲低昂逡巡待客知誰氏
焉得望諸君不死練兵一夕鑿咸陽斷折銅柱柱有光
剗虎屠龍知有策燕丹首逆於期血宜陽片土不入秦

何得東尋滄海君

紅橋版書尺歌爲張芑堂明經

燕昌

作

張君愛古心崛奇涉筆變眈馳蛟螭舊臨黃庭結眞想
篆籀飛白靡不爲嚴冬復月武林郭把臂躑躅相娛嬉
陡然示我古神木星精宿彩凌軒羲截肪切玉製方尺
薄如冰瓣平如砥鏗森爪甲質金石糾結雷霧紋尊彝
霜寒鐙昏敢狎視武夷神君之所貽大王峯高屹兩壁
鑿崖架閣誰與施鋸裁扶桑作橋柱手擘六氣爲橋維
何年墮落億萬丈片板持壓千魴夔藉非文章瑞天下
神物何幸得所歸張君昔交延陵氏點染彩筆畱款題

甲庚以來七年矣行遊塵市轉得之

芭堂爲余言乾隆甲午歲吳君達夫

出此版見示云得之曝書亭朱氏爲作分書八字並署名版上閱七年吳君歿後鬻於武林書肆題識宛然急爲購歸摩挲再三

不勝今昔之感

撫摩仙澤志矜重搜訪昔乘神聘貽

古云神仙可望不可卽蛻物在手夫何疑聚形桃核萬
荒怪詎敵炳蔚無瑕疵辟邪高尋古仙語壯觀細讀前
賢詩從今寶藏石室伴四庫夜夜吐氣成虹霓

次韻題湘管聯吟卷并送陳無軒

焯

之官慈谿

湖海中閒拓瓊屋寫作叢蘭并秋竹蘭徵心素竹染毫
怪煞清吟人似玉前身畫師宋與朱點綴溪山拂簷綠
齋頭積卷映層霄閣上浮煙罨寒谷叩門我惜趨步晚

皮篋新圖未流目妍詞百疊今見之展紙呼曹共傳錄
漸江風氣逼人寒子敬儼居真不俗安得南村伴欣賞
晨夕鼓此無絃曲翠色明州四牖開籜龍萬个非梁肉
踏歌聲裏送君行一帆東去風清穆

題墨馬圖

諸梁好士如好龍畫龍豈與真龍同世無驕驍與瓦礫
坐以筆墨付畫工王孫貌馬入馬腹維摩急掃風霧鬣
莊嚴瓔珞俶儻骨松媒鼠穎四際融何爲畫馬必八匹
快覺脫羈銜轡空一一薺草復飲水宛頸嬉戲如鵝鴻
古來畫肉亦不易慘淡驪黃牝牡中鑄金作式未央殿

眞師天廐酣長風應是聞思胎變後了無馬相存其曾
脫然眞圖落人世摹倣亦足參神功誰善知馬善知畫
不以奇譎觀驂驄懸光噴玉理必至買駿築臺神已雄
將去西湖畱別院中月季花并呈諸友

我昔初來花未開我今欲去花仍發花發於人偏有情
花開羨爾曾無歇十年游舊濤江濱惜花重碾西湖雲
西湖雲氣攬不盡笑對紅顏玉貌如長春一叢輾轉紅
闌曲雨雨風風枝斷續客去從教花不繁鵲鳩一聲山
水綠良宵對酒戀春容際曉清光積霧烘霧色蟾光花
處處人非比翼誰相從坐對名山恆草草今朝輒道西

湖好欲取花枝入夢中試尋花影紛如掃湖山神廟百花嬌一枝那兼四季妍人生用意長如爾雨覆風翻莫慨然

雨後偕葉履仁陳獻九湖濱晚眺

湖山迢遞煙氛濃墨雲凍雨兼長風裏湖跳珠外湖黑兩髻滅沒三潭封須臾淨掃碧天色四山決水回奔洪是時夏初桃杏歇洗滌春膩雨有功我約葉陳訪清景出餞落照當西穹高橋橫波四望極長隄墜翠千山重一峯披縣儼白鶴餘姿收拾乍未窮一峯回光攝倒景宛轉吐焰如長虹移情奪志杳莫測湖心恍作蒼瀛通

相將尋幽共集此精廬棲泊君偶同時光閃爍劇奔駟
轉看星斗捫其胸作詩深緘畀湖水莫將嬉笑驚兒童
禾城訪曹種梅明經

曹君磊落人中豪揮翰著紙如霜颺胸無柴棘語不弔
十年見之猶一朝我家越東山水均層波疊翠古畫綃
相從每惜會面遠郵箋卻寄心忉騷釣船忽繫官河柳
荻月蘆花紛左右曠懷色笑旁人驚僮僕心親軟語久
藤花書屋古城邊游氛不入冰絲絃試展一觴彈一曲
皎如明湖綠水披紅蓮肯來相就無須請剔燭論心夜
逾丙行藏未卜靈氛占身世欲同仙鶴警不如棄置千

微塵麗書萬卷酣清真城南尋幽逸思滿得句踟躕疑
有神交游並世無俗侶評隲千古多先民滄波茫茫鳬
鴈迴瓊瑜重訂名山珍

出郭尋荷花至張字圩回舟過鉏月居士閒話有
作

羅雲翻空波活活水深不見芙蕖發潑面清香何處來
蘆菱遠寄魚鱗室逢人轉問花深處櫓繞湖塘不知數
相逢老嫗似畏人可曾解否香山句秋思橫空思遠哉
蓼灘泱泱風推排幽人靜寄水雲裏紅白生綃堂上開
尋花莫論花多少談頃秋階葉如掃碧雲入暮湖水清

餘馥沾衣一舟小

曲池篇

渚水作池澄更清芙蓉秀發蒹葭明碧石齒齒紫苔縈
半浸雲影含光晶是中澄澈善鑒形有本不遣波瀾生
一雙赤鯉游深泓軒耆鼓鬣上下征雷雨不化綸不驚
衆中竊聽彈琴聲迴身跳破滄浪情圓漪暈折浮空青
吾聞滄海東蓬瀛羣仙偶坐長娉婷上穹下壤島嶼成
疊石擬作崑崙肩輝耀紫闕黃金城欲往從之風水并
側身凝望勞乞靈朝來梳髮倚兩楹大地一粟天清冷
曲池灩灩環軒庭浩歌淥水情思冥不逐成連徬海行

西園賞菊長句二首

美哉西園橫數弓散藝黃菊兼駢紅玉膚翹蕭最可念
皎如明月當青穹一花卽是一君子姿材殊出骨性同
雅宜位置列庭宇或頗淡逸依林叢參差摹作曉天色
浩蕩寫出深秋容白衣之子來何庸無懷葛天醉正濃
芬馨醉體德醉意枝閒自有雲千鍾高齋漠漠彫梧桐
紅葉碧柳隨秋風三春栽植始有此萬葉琬琢天爲功
精華探從日月窟芒彩散入星辰宮舒屏列几美無度
九師八俊來相從

建溪百戶明秋煙中園黃菊光燭天有客陶姓其名潛
竭來所見唯南山南山中有忘機客瑤琴一張酒一石
漢家角綺偉衣冠上古缺倪忘食色此人此菊良相似
廊廟山林隨所委試薦君王益壽筵馨潔不同凡簞簋
高秋萬藥森璘璘欲採何枝持贈人閉戶攝衣翻獨笑
曉霜涼月洗精神

有感

君不見城南山空翠窈渺誰能攀登樓看山山在目長
自突兀雲霄閒又不見東溪水漁舟一雙漾清泚縱有
深冬堅涸時終古經流不曾止人生逐物良悠悠不如

息鞅歸林邱此閒多少佳山水隨意清心試獨游

三江聞謁湯太守祠

魚麗列郡紹多水浦陽江波貫終始麻溪橫間仰前籌
葑田塆積歲有秋三江自昔無收蓄海口濤瀾齧人屋
太守憤起攄精誠八百里水平以衡鑿石連山隄海若
廿八星宮動垠塢神祠儼肅奏明禋木君隸耳今爲神
乃知功德蔑不報勤民以死宜廟貌波光如飛雪下天
登高望海海氣旋彈丸小城鎮東越靜與公祠映突兀
高秋振柁平無陂海晏江澄風雨時

江縣吟

江縣神明宰春農播殖時經年趨幕府此日念烝絜烝
黎駢闐走催喚架椽築屋依江岸欄楯周遭不日成亭
臺綺錯連雲煥兩廂羅列歌吹樓前庭後室迷星周倏
如蜃宮矗海底朗如瓊閣棲瀛洲客來問訊語還悻大
官昨發滄江滴水面招搖畫艦浮岸頭餐寢須臾事偉
哉仙令何能然鬼工平地增袤延璫璣璚璚鋪滿眼明
珠瑤璧輝江天官儲盈盈民樂助省耕問疾稱侯度十
家中產安足云連州薄幸新蠲賦君不見司城子罕無
地無卻笑唐家何易于

秋蘭

澤蘭不是山中產去歲花邊誰把盞卻愁繁馥盡向人
一二幽芬殊剗剗西風搜剔殘暑醒長莖出葉短蔽櫺
我愛綠盆如綠玉移時淨拭兩眼青語闌卻坐聞花聲

秋海棠

春風豔質壓桃李不知邇可安巢未羅裳掩恨秋如水
膩溼淫淫暈殘紫葉衣花面語信工心有思兮思未窮
綠葉紅襟不飛去翾翻覲欲窺簾櫳嗟君一笑明蟾空

磨心潭義烈行

并序

暨陽江中有磨心潭順治初顧門節婦石氏姚氏及
鄰婢蔡氏避山寇殉節於此潭化爲阜蔣孝廉載康

以文徵詩爲賦此篇

磨心潭中一阜嶽是阜非阜三烈心顧家婦石年十八
鴛鴦機斷奉翁活從娣十四其氏姚早遣鄰鬟識冰雪
紛紜白馬遶江來蘆葦深叢雞唱哀棹舟西匿棹舟返
四江匯水傾靈雷宵深月黑江無底得義不知江是水
氏姚躍入鬟從之節婦節甘之死靡三心一氣天風號
沈沈砥柱無厓濤上感

九重鬱穹表下徹大地連靈鼇東州文雄三徑豪聞聲
未識面久撓蜚牋紀實出金石爲賦磨心潭引當雲璈
合溪黃氏宗祠扁文學二字方正學先生爲田閒

居士黃

景昌

書睇觀成詠

合溪祠屋光如虹尺幅中有台山容台山生接宋儒後

學追劉董文文公田閒居士稽古功柳吳講習宋所同

遺編寥落經史遠春秋奧義楚漢風

居士有周正如傳論楚漢正聲諸書

韻流一派紹九龍義門煥炳昭秋穹

居士之先有黃氏九龍之稱黃氏累

世同居旌曰義門

疇先表揚正學翁攜囊蹴踏仙華峯內聖外

王真訣在壁窠大字標鸞鴻孔門科四本則一吳游衛

夏詩禮宗浦陽千秋小鄒魯賴此樸學追高蹤雙溪澄

泓廟貌崇寒潮千里不復通丈夫彼我成睨勇天地帥

塞橫渠雄敬慕波磔想車服後生小子心無窮

戲題蔣六兼畫虎

蔣謙字六兼長身虎目鬚髯疑世閒萬事棄不道丹青
一抹如雲煙生平新圖有千虎猛氣赫奕難封緘東堂
何爲挂此幅十指委骨行饕餮猗嗟萬事溯伊始宗彝
虎雌粲厥美垂衣聖人指中天此是畫虎眞緣起進探
象學窮太初革爻九五變有孚若非炳文具一畫庖犧
澤火胡爲乎自來侯封遍山澤龍符虎符繪以節騶虞
入奏射禮完熊侯豹侯未得班齟齬廿四百獸舞郵囑
百物昆蟲還兵農禮樂有必備詩書易象堪證言是知
畫虎足矩矱豎儒末技何有焉毛蟲三百六十屬麒麟

可畜無神姦眈眈爭長旣不得弭伏姑行草澤聞我知
之矣意有在安不忘危聖所戒如熊如羆矯矯臣爲時
折衝廓邊海深林巨谷百變威一朝登進同雲雷仁禽
不折生草幹以爾侑助全其材君不見東堂摸神睛閃
爍何日圖彤向麟閣蔣侯蔣侯爵爾酒滿觥畫意如斯
應不惡

割肱行爲張孝女賦

弱女質具佛性報母心湛堅定口誦觀音言一日四百
竟甲辰冬風力勁割左肱肉續母命血淋漓淚交迸命
續十五日自望及朔咸感大士聖吁嗟女兮割肉療母

敢令父母知母弗知以沒朞月不粥百日不味戚傷逾
歲父知之父知之綴以辭喬皇篇詠益女悲誦讚各見
性翹首慈雲慈

武林寓舍與郭春林

統話舊

憶昔遠慕鷗鵬遊君居越州我婺州兩地雲連山水接
無緣拍袂追浮邱英英玉立有楊子

楊統甫孝廉

哆口談君

詩格美興搖五嶽凌滄洲人閒富貴等閒耳新詩寄去
秋鴻飛丹墨淋漓點染歸五洩筇枝追不及三江帆影
來無期無端忽鼓西興棹鑑水爐峯相視笑笑聲未斷
風劃開蕭然山對吳山嶠此後相逢事偶然合襟分手

風希堂詩集卷二

三

九靈山房

音亮

不終筵只今旅館重邂逅細憶蒼茫十載前風馳雨驟
紛於織羨君狂氣猶如昔兩見衰裳漬淚痕卻驚蟻磨
畱陳迹我方養疴明湖濱碧天照水流春雲肝膈洞開
湖作沼百錢沽酒生微醺十年遊舊如君少把臂相看
態更好隻字畱將見古人百年有命聽蒼昊斂華就實
夙所敦江東風雅今誰倫豪吟感舊錢江上江潮遠避
聲無喧

五言律詩

遊仙華山二首

第四巖邊住嚴關迴不開回頭看溟滓過此卽蓬萊蟻

聚石爲室鵬驚雲作臺蒼藤攀附罷芝草白氈皚
策杖來何處高巖太古仙浮雲逼滄海赤日耀青天遠
景未須道清心賴此傳悠悠捫石去芒屨下平田

華川道中

風雨華川道深泥載滿塗波濤春夜市禾黍浸秋湖拂
樹驚鶩鶴沿隄唱鷓鴣行人朝飯罷倚檻眺平蕪

新晴

新晴添妙思流水碧潺潺霧裏分遙樹雲中出遠山浮
空高鳥去映日古松閒借問煙霄路輕霏咫尺閒

西興晚眺

旅館浮春甕江亭試袷衣雲邊看遠嶠渡口擁殘暉浪靜帆殊便時清埃自稀暝煙雙鳥落空翠正霏霏

越州

禹計神明在隋營雉堞雄一山來異域雙塔聳層空巷逐朱甍映橋連畫鷁通盤桓多遠興人物古江東

東趙德淵

最憶幽棲地蒼茫暨水波人情驚傲兀文格挽江河嗜酒豪偏甚窺廚冷若何秋風翻絕壁相待拂雲蘿

七言律詩

對雪得友人書分韻

曉蹋羣峯歸去寒重添襟袖坐闌干正逢石友攜書至
共啟瓊華對雪看山館句成深一尺野田風急舞千盤
定知簑笠寒江外遠影扁舟著釣竿

過五洩

羣巒闔闢兩溪迴過客疎筇淡不猜雲霧盡隨高峽去
藤蘿曾枉昔賢來虹飛瀑布思元始雨點龍宮洗薄埃
山子不勞勤指引爐峯千仞慣徘徊

宿五雲山麓

不知井底復崖邊襖被羣山盡處眠竹葉低時雲壓地
花陰深處月中天瓊瑤水入溝渠碧劒戟峯圍聚落懸

借問卜居誰住此料應玉洞本巢仙

西湖雅集送鄢畫村歸湖南

詩家玉管粲瓊瑤閒傍春洲倚畫橈
山色不隨人俯仰波光時與客招邀
芷蘭莫遣思公子水月何妨吹洞簫
明日綠楊隄畔去紛紛別思似長條

湖濤步月卽事

月痕新似裏湖濤波影天光拂袖閑
水面絕無舟一葉雲根賸有屋三閒
滿隄風緊人難住隔岸簫清鶴自還
澄景脩然看不足相邀重過紫瓊山

嘉禾攬古四首

望盡平畦際碧天
胥山一點小於拳
江湖網絡塗泥國
周漢雲爭叔季年
地有連城供百戰
人聞捨宅媚三禪
古來興滅知多少
卻寄遙情煙雨邊

梵王舊宅金明寺
千古猶傳范相家
棹拂湖波長不返
樓懸妝鏡向誰誇
門成磊石輕蒲羸
井起神光映落伽
十策至今徵富國
翩翩墳衍說桑麻

派接臨苕衆水趨
清漣淙淙散濱湖
星精騰處光凌斗
地壤開時賦入吳
舊國稔知魚樂在
高城遙識馬嘒無
平樓極望參瀛海
霞氣滄茫映綠蕪

鴛鴦湖色鏡紋平
蕩樂菱歌曉夜清
黛柏雲松偃王廟

文絲白紵女兒城橋名內相虹猶跨寺首金王象欲鳴
盡日澄光看不足伴誰煮茗淪雲英

婺城寓齋遣興

城陰巖色此閒同盡日徘徊斗室中俗客不來聊避熱
長風忽到已稱雄池垣繚繞低圍樹樓雉參差遠映空
爲問牧羊人遠近雲浮潛岳自龍蔥

高閣晚眺

山蟬鳴罷鷓鴣鳴極目江天晚電明老樹百圍風散影
危欄千尺雨飛聲浮嵐出沒眞無際遠壑迎將倍有情
高閣由來閱人代不知臨眺幾縱橫

呈王東塘翁二首

手種龍鱗耿十尋風來石室佐鳴琴
煙雲自供幽居事山水長含古處心
娛老揚雄頻挾槩歸陶令早抽簪
從容曉日香秔飯硬紙黃庭細細臨

森然白髮照庭幽魚鳥空山識故侯
自遣心情忘組紱閒看日月老林邱
千年劒匣涵星氣百丈龍泓倚石湫
獻賦有誰遵往躅蓬蒿決起想飛遊

杜節愍

學伸祠

表節褒忠

聖代恩靈旗長護孝陵園議分閩魯雖殘局死繼朱張

豈異論回憶中原糜爛日尚逢內使錦萋言山城抗志
光星漢惟有諸公薦牘存

五言絕句

南湖曲二首

小艇南城曲雲帆試一張無嫌風色峭菱蕩隔蒼茫
欄楯棲天半行吟獨偶憑老松閒閣鶯靜水淡依僧

七言絕句

蘆鳥船吟四首

綠榜烏篷繡水湄聲牙鄉語刺船遲斜風細雨垂垂柳
正是東江喚渡時

客來芒履復青衫塘上家家識布帆一葉小舟雲際下
鷺拳波影踵相銜

煙浮岸上赤盤盤白石縱橫水拍灘昨夜稠城風雨急
泊船穩臥待新湍

落日停舟買酒還清歌款乃碧波閒兩涯雲樹橫如薺
爭說前頭積道山

山居漫興

林雨巖煙暮復朝披衣無事立溪橋鄰翁其間閒遊地
十里青山長藥苗

風希堂詩集卷二終